



Broj/Број: 04/2-50-1-16-6-1/04  
Sarajevo/Сарајево, 11. oktobar 2004.

**ZAPISNIK**  
sa šeste sjednice Zajedničke komisije za evropske integracije

Sjednica je održana 11. oktobra 2004. sa početkom u 15.10.

Sjednici su prisustvovali: Fatima Leho, Vinko Radovanović, Filip Andrić, Nenad Mišić, Selim Bešlić, Ilija Filipović, Halid Genjac, Hilmo Neimarlija, Milorad Živković.

Sjednici je prisustvovala Dženana Hodžić iz Direkcije za evropske integracije.

Odsutni su bili: Branko Zrno, Boško Šiljegović, Mehmed Suljkanović (zbog učešća na Kolokviju u Briselu).

Predsjedavajuća Komisije gđa Leho predložila je sljedeći

**DNEVNI RED**

1. Usvajanje zapisnika sa prethodnih sjednica
2. Šesti interparlamentarni sastanak Parlamentarna skupština Bosne i Hercegovine – Evropski parlament: Zajednička komisija za evropske integracije PS BiH – Delegacija Evropskog parlamenta za odnose s Albanijom, Bosnom i Hercegovinom, i Srbijom i Crnom Gorom u Mostaru 3. i 4. novembra 2004.
3. Inicijativa za sazivanje Konferencije parlamentarnih komisija za evropske integracije država članica Procesu stabilizacije i pridruživanja – Jugoistočne Evrope
4. Informacija o izvršenju obaveza po Studiji izvodljivosti za Bosnu i Hercegovinu – 16 prioriteta
5. Razno

Predloženi dnevni red je usvojen.

Ad.1. Usvajanje zapisnika sa prethodnih sjednica

Komisija je usvojila zapisnike sa prve, druge, četvrte i pete sjednice.

Ad.2. Šesti interparlamentarni sastanak Parlamentarna skupština Bosne i Hercegovine – Evropski parlament: Zajednička komisija za evropske integracije PS BiH – Delegacija Evropskog parlamenta u Mostaru 3. i 4. novembra 2004.

G. Bešliagić i g. Andrić su predložili dogovor Komisije o tome koji član Komisije će dati uvodno izlaganje o kojoj temi iz dnevnog reda.

Zaključeno je da uvodno izlaganje o tački 3. Politička situacija u BiH ima gđa Leho, o tački 4. Politike Evropske unije prema Zapadnom Balkanu – g. Genjac, o tački 5. Vojna operacija Evropske unije ALTHEA – g. Radovanović, o tački 6. Situacija u oblasti pravosuđa i unutrašnjih poslova – g. Filipović. G. Filipović je kazao da će iznijeti svoj osobni stav. Nakon uvodnih izlaganja i ostali članovi Komisije će učestvovati u diskusiji o svakoj temi.

G. Genjac je predložio održavanje još jedne sjednice Komisije radi pripreme stavova.

Zaključeno je da Komisija održi sastanak u Mostaru 2. novembra 2004. u 17.00.

U raspravi o predloženom dnevnom redu i programu g. Radovanović je predložio da u tački 3. dnevnog reda bude bliže definisana druga tema, priprema na putu prema evropskim integracijama, i da se više govori o 16 prioriteta iz Studije izvodljivosti.

G. Živković je istakao da je za tačku 4. potrebno predložiti da o toj temi, politikama Evropske unije prema Zapadnom Balkanu, govore članovi Delegacije Evropskog parlamenta, a da tema iz tačke 5. dnevnog reda, vojna operacija Evropske unije ALTHEA u Bosni i Hercegovini, nije odgovarajuća za razgovore ove Komisije.

G. Radovanović je dodao da bi i o temi vojna operacija Evropske unije ALTHEA trebalo da uvodno izvijeste članovi Delegacije Evropskog parlamenta.

S ovim prijedlozima se složio i g. Bešliagić.

U vezi s tačkom 6, situacija u oblasti pravosuđa i unutrašnjih poslova, g. Bešliagić je istakao da je potrebno Delegaciju Evropskog parlamenta upoznati s problemom unutrašnje međusobne neusklađenosti zakona u Bosni i Hercegovini, koja otežava njihovu primjenu u praksi.

G. Filipović je izrazio slično mišljenje. Istakao je da ova tema zahtijeva ozbiljan pristup i da je potrebno ukazati na situaciju u kojoj nas sa svih strana zatrpavaju nekonzistentnim zakonima.

Ukazao je i na situaciju u kojoj se dira u neovisnost i ustavnost najvišeg sudbenog tijela u Bosni i Hercegovini.

Ukazao je na minornu ulogu Zajedničke komisije za evropske integracije u procesu donošenja zakona i u koracima ka evropskim integracijama. Istakao je da u početnim fazama donošenja zakona treba o njima informirati svako nadležno tijelo u Parlamentu.

G. Andrić se složio s onim što su istakli gospoda Bešliagić i Filipović i ukazao na potrebu poštovanja procedure u donošenju zakona.

G. Genjac je istakao da je Zajednička komisija za evropske integracije partner Delegaciji Evropskog parlamenta za razgovore o svim temama.

Govoreći o programu, gđa Leho je objasnila da se sadašnji nacrt programa razlikuje od onog koji smo mi u početku predložili.

Ad.3. Inicijativa za sazivanje Konferencije parlamentarnih komisija za evropske integracije država članica Procesu stabilizacije i pridruživanja – Jugoistočne Evrope

Gđa Leho je izvijestila članove Komisije o prijedlogu Direkcije za evropske integracije da Komisija inicira sazivanje navedene Konferencije u Sarajevu. O prijedlogu su obaviješteni Kolegiji PS BiH. Za realizaciju ove inicijative nedostajalo je novca, a zatim je Fondacija Konrad Adenauer pokazala spremnost da snosi troškove Konferencije, koja bi se održala u januaru 2005. Gđa Leho je od Kolegija zatražila mišljenje, saglasnost i sugestije za teme, a poslije toga bi se krenulo u realizaciju inicijative.

G. Genjac je predložio održavanje Konferencije na Vlačiću.

G. Mišić je istakao da se često u sličnim situacijama ističe problem finansiranja i iznio mišljenje da treba nešto uraditi da na tome da se prilikom sličnih inicijativa ne postavlja odmah pitanje finansiranja.

Gđica Dženana Hodžić je kazala da je prijedlog Fondacije da se Konferencija održi u petak, a da se u subotu organizuje izlet npr. na Igman i posjeta Mostaru. Na konferenciju će biti pozvani i članovi Evropskog parlamenta.

G. Filipović je istakao da ulogu Komisije vidi drugačije, kao učešće na konkretnim susretima i temama.

G. Radovanović je iznio pozitivno mišljenje o organiziranju izleta, jer imamo šta pokazati i treba to da pokažemo.

G. Neimarlija je podržao inicijativu i istakao da je moguće da zbog statusa Komisije ona neće moći na najbolji način organizirati konferenciju. Komisije za evropske integracije u zemljama Jugoistočne Evrope imaju drugačiji status i svjedoče važnost parlamenta u procesu. Predložio je da u okviru priprema za organiziranje konferencije Komisija posjeti Hrvatsku i susretne se sa Komisijom za evropske integracije. Istakao je potrebu razmjene iskustava sa nekom od zemalja.

Gđa Leho je podsjetila da su Komisije za evropske integracije zemalja Jugoistočne Evrope imale susret u Sarajevu prošle godine. Bile su prisutne i Komisije iz Bugarske i Rumunije.

G. Filipović je predložio da kolegij Komisije i tri člana Komisije kao delegacija posjete Komisiju i Ministarstvo za evropske integracije Hrvatske.

#### Ad.4. Informacija o izvršenju obaveza po Studiji izvodljivosti za Bosnu i Hercegovinu – 16 prioriteta

Gđica Dženana Hodžić je izvijestila Komisiju da Direkcija za evropske integracije očekuje sljedeći sastanak Konsultativne radne grupe (CTF) s Evropskom unijom početkom novembra 2004. Od 16 prioriteta oblasti pravosuđe je jedina oblast koja ima sasvim pozitivnu ocjenu. Izvijestila je i da Direkcija pokušava od Evropske unije dobiti novi Road Map (Mapu puta – Smjernice), kao i olakšice viznog režima.

G. Živković je iznio primjedbu na listu izvršenih obaveza zbog toga što u njoj nije navedeno zašto su u nekim oblastima probijeni rokovi, šta nije izvršeno i koji su razlozi za to. Istakao je da je to jedan od načina na koji Komisija treba da radi. Podsjetio je da je predlagao postojanje Ministarstva za evropske integracije, kako bi Komisija nadgledala i njegov rad.

G. Radovanović je istakao da se dvije obaveze nalaze tek u fazi radnih grupa: Zakon o popisu stanovništva i Zakon o izmjenama i dopunama Zakona o konkurenciji. Predložio je zaključak da Komisija zatraži od nadležnih ministarstava odgovor zbog čega se u određenim oblastima kasni, što je prihvaćeno.

#### Ad.5. Razno

G. Filipović je istakao nezadovoljstvo ukupnom ulogom Zajedničke komisije za evropske integracije. Podsjetio je da je u toku rad Komisija za izmjene i dopune Poslovnika, da su izmjene i dopune

pripremljene, i u njima opet nema ingerencija ove Komisije. A sve oblasti će se ticati acquisa i nijedna od njih neće u proceduri prolaziti kroz ovu Komisiju. Potrebno je da se radi onako kako je napisano u nadležnostima Komisije.

Gđa Leho je pročitala sve nadležnosti i istakla da dijeli mišljenje kolega. Složila se s tim da je mnogo toga dato Komisiji u nadležnost, a u proceduri rada nigdje nije predviđeno da predloženi zakoni idu na razmatranje Komisiji. Možda u tom smislu treba nešto mijenjati.

G. Mišić je postavio pitanje dobivanja viza za Komisije. Istakao je da, ako se vize mogu dobiti lobiranjem, da to treba učiniti.

G. Živković je predložio da Komisija upozna gđu Paćk sa problemom izdavanja viza za članove Komisije i da zatraži pomoć za vrijeme održavanja bilateralnog susreta sa Delegacijom Evropskog parlamenta u Mostaru.

Sjednica je završena u 16.30.

Zapisnik sačinila  
Sena Bajraktarević

Fatima Leho,  
predsjedavajuća Zajedničke komisije  
za evropske integracije